

आकाशवाणी

खबरां ----

1 जी-20 सिखर सम्मेलन अज्ज संझा ब्राजील दे रियो डी जनेरियो शैळरै च शुरू होग। प्रधानमंत्री नरेंद्र मोदी बक्ख-बक्ख वैश्विक मुद्दें ते नमीं दिल्ली घोषणा पत्र दे नतीजें पर भारत दी स्थिति स्पष्ट करडन।

2 भारत 2024 बरे च सब्बनै शा मती अंदाजन 7 प्रतिशत दी सकल घरेलू उत्पाद-जीडीपी कन्ने जी-20 मुखें चा सब्बनै शा उप्पर ऐ।

3 राश्ट्रीय युवा उत्सव 2025 गी विकसित भारत युवा नेता वार्ता दे तौर पर मनाया जाग।

4 त्रंऊं हफ्तें च गै आयुश्मान वय वंदना पंजीकरण 10 लक्ख दे आंकड़े तकर पुज्जी गेआ ऐ।

5 झारखंड ते महाराष्ट्र च असेंबली चुनाएं दे दुए मरहले लेई चुनां प्रचार अज्ज संझा सम्पन्न होई गेआ।

## G-20 Summit

19में जी-20 शिखर सम्मेलन दे आयोजन लेई ब्राजील दे रिओ डे जनेरियो दा म्यूजियम ऑफ मॉडर्न आर्ट पूरी चाल्नी तैयार ऐ जित्थे मिम्बर मुखें दे अध्यक्ष ते अंतरराष्ट्रीय संगठनें दे प्रतिनिधि, इस बरे दिएं घोषणाएं दे प्राथमिकताएं आहले बक्ख-बक्ख सत्रें दौरान चर्चाएं च हिस्सा लेंगन। एहदे शा पैहले अज्ज उत्थे पुज्जने पर प्रधानमंत्री नरेंद्र मोदी हंदा शानदार ते निग्गा सोआगत कीता गेआ। अजें कि ब्राजील च रौहने आहले भारतीयें दी गिनतरी मसां कोई 4 साइडे 4 जहार गै ऐ पर प्रधानमंत्री मोदी हुंदे सुआगत सत्कार लेई आए दे लोकें दा जोश दिक्खदे गै बना करदा हा। ऐकती इस शिखर सम्मेलन दी शुरूआत जिस विषे कन्नै शुरू होआ रदा ऐ ओह ऐ “इक्क न्याय ते टिकाऊ विश्व“। शिखर सम्मेलन दे पैहले रोज दुनिया दे नेता गरीबी ते भुक्खमरी बारै कुल संसारी गठबंधन दे बारै च सलाह सूत्र करंगन जिसले जे दुए ध्याड़े कुल संसारी शासकीय संस्थानें च सुधारें बारै गल्लबात कीती जाग।

<><><><><><>

## **Brazil-Ambassador**

ब्राजील भारत दे राजदूत सुरेश के. रेड्डी होरें जोर देइयै आखेआ ऐ जे 'ग्लोबल साउथ' मुल्खें दे इक अगुवाह दे तौरा पर इनें मुल्खें दे हितें दी राखी लेई होरनें मुल्खें कन्ने जुड़ै करदा ऐ। प्रधानमंत्री नरेंद्र मोदी हुंदे ब्राजील दौरै, जेदे च ओह जी-20 शिखर सम्मेलन च हिस्सा लैने लेई गेदे न, दे बारे च आकाशवाणी गी दिते गेदे इक चेचे इंटरव्यू च रेड्डी होरें आखेआ जे ब्राजील ते दक्खन अफ्रीका दे कन्नो-कन्नी भारत जी-20 बी भ्याल ऐ। ते इनें त्रौनें मुल्खें दी तिगड़ी किट्ठे रलियै ग्लोबल साउथ दे हितें, मुद्दें ते समस्याएं गी उजागर करै करदे न। भारतीय राजदूत नै इंटरव्यू दौरान गै इब्बी आखेआ जे जी-20 शिखर सम्मेलन भारत-ब्राजील सरबंधें गी निगगर बनाने दे कन्नो-कन्नी कुल संसारी सहयोग गी बदाने ते होरनें मुद्दें गी बी तगड़ेयाई कन्ने पुट्टारदा ऐ।

<><><><><><><><>

## **India-GDP**

2024 बरे लेई अनुमानिक 7 प्रतिशत सकल घरेलू उत्पाद जानी जीडीपी दी विकास दर कन्ने भारत जी-20 मुल्खें च सब्बनें शा अगगे ऐ। भारत दे सरकारी फोरम My Gov नै इक सोशल मीडिया पोस्ट च

आखेआ ऐ जे एह भारत दी निग्गर अर्थ बवस्था गी उजागर करदा ऐ।  
भारत दे बाद 5 प्रतिशत जीडीपी विकास दर कन्नै इंडोनेशिया दुए ते  
4 इशारिया 8 प्रतिशत दी रफतार कन्नै चीज त्रीए नम्बरै पर ऐ।

<><><><><><>

### Young-Leader

राश्ट्रीय युवा उत्सव 2025 अगले बरे 11 शा 12 जनवरी गी विकसित  
भारत युवा नेता वार्ता दे तौरा पर मनाया जाग। अज्ज नर्मी दिल्ली च  
पत्रकार सम्मेलन दौरान केंद्री युवा मामले ते खेड्ढ मंत्री डॉ. मनसुख  
मांडविया हौरें एह जानकारी दिती। उनें गलाया जे एह मंच देश दे युवा  
शक्ति गी प्रधानमंत्री नरेंद्र मोदी हुंदे कन्नै मिलने ते अपने विचार  
सांझे करने दा मौका प्रदान करोग। डॉ. मांडविया हौरें गलाया जे इस  
संवाद दा उद्देश्य पूरे मुल्ख दे युवाएं च प्रतिभा दी पंछान करना ऐ।

<><><><><><>

### Ayushman-Health Card

नर्मी शुरू कीती गेदी आयुश्मान वय वंदना कार्ड लेई 10 लकख कोला  
मते बुजुर्गे अपना पंजीकरण कराई लैता ऐ जिंदी उम्र 70 बरें जां  
एहदे कोला उप्पर ऐ। इंदे च 4 लकख महिलां बुजुर्ग बी शामिल न।

सेहत ते परोआर कल्याण मंत्रालय नै इस बारे जानकारी सांझी करदे होई आखेआ जे 29 अक्टूबर गी प्रधानमंत्री हुंदे आसेआ इस कार्ड गी जारी करने दे त्रंऊं हफ्तें अंदर गै एह गिनतरी दर्ज कीती गई ऐ। मंत्रालय नै दस्सेआ जे नमें लांच कीते गेदे कार्ड कन्नै 70 बरें ते ओहदे कोला उप्पर दी बरेसू दे 4 जहार 800 कोलां मते बुजुर्गें गी फैयदा पुज्जा ऐ जिंदे चा 1 जहार 400 महिलां न। एह कार्ड आयुश्मान भारत प्रधानमंत्री जन आरोग्य योजना दा हिस्सा ऐ जेदा फैयदा कोई बी भारतीय नागरिक जेहदी उम्र 70 बरे जां एहदे शा उप्पर होए, लेई सकदा ऐ।

<><><><><><><><>

### SMVD

इस बरे अजें तगर 86 लकख शा मते यात्रुएं त्रिकूट पहाड़ें उप्पर स्थित माता वैशणा देवी दे मंदरें च मत्था टेकेआ ऐ। श्री माता वैशणो देवी श्राइन बोर्ड दे सीईओ अंशुग गर्ग होंरें आखेआ जे एह गिनतरी दिसंबर दे अखीर तगर बधियै 95 लकख तगर जाई सकदी ऐ। उनें गलाया जे हर बरे माता वैशणो देवी दे दरबार औने आहले यात्रुएं दी गिनतरी बदधी जंदी ऐ। पिछले 95 लकख यात्रुएं माता दे दरबार मत्था टेकेआ हा। इस बरे इस रिकार्ड दे त्रुट्टने दी मेद ऐ। श्राइन बोर्ड दे बनी जाने

दे बाद थमां गै माता दे दरबार मत्था टेकने आहलें दी गिनतरी हर बरे बधदी आवा'रदी ऐ। 2012 बरे रिकार्ड 1 करोड़ 4 लक्ख यात्रुएं ते 2011 बरें च 1 करोड़ 1 लक्ख यात्रुएं माता दे दरबार मत्था टेकेआ हा। श्राइन बोर्ड नै पिछले किश बरें थमां यात्रुएं दी सुविधा लेई नमियां-नमियां सहूलतां शुरू कीतियां न ते एहदे मददेनजर हर बरे यात्रुएं दी गिनतरी च इजाफा होआ'रदा ऐ।

<><><><><><>

### **Germany**

जर्मनी नै घोषणा कीती ऐ जे ओह इस बरे दे अखीरै तकर नौकरियां करने आलें आस्तै 2 लक्ख वीजें गी मंजूरी देग जेड़ा पिछले बरे कशा 10 प्रतिशत मता ऐ। यूरोप सब्भनें शा बड्डी अर्थ बवस्था ऐ ते इत्थें कम्मगारें दी बड़ी मती थोड़ ऐ।

<><><><><><>

### **Gabonese-Voters**

गैबोन दे मतदाताएं 91 अशारिया 8 प्रतिशत भारी मतदान करियै नमें संविधान गी मंजूरी देई दिती ऐ। नमें संविधान दी तज्वीज मुल्खै दे फौजी हुक्मरानें आसेआ पेश कीती गेई ही। अगस्त 2023 च सेना दे

अफसर राष्ट्रपति अली बॉगो ऑण्डिम्बा दी सत्ता पलटियै आपुं मुख्खै  
दी भागडोर साम्भी लेती ही ते राष्ट्रपति होरें गी नजरबंद करी दिता  
हा।

<><><><><><><>

### Jawahar-tunnel

केई दहाकें तगर घाटी दे प्रवेशद्वार दे रूपै च मुख्खै गी कश्मीर घाटी  
कन्नै जोड़ने आहले इक्कमात्र रस्ते दे रूपै च अपनी सेवा दिंदी  
आवारदी ढाई किलो मीटर कोला बी लम्मी ज्वाहर सुरंग दी मरम्मत  
करियै इसी नमें सिरेआ सोआरने ते भलेआं अज्जै-कल्लै दिएं तकनीकें  
ते सेवाएं सुविधाएं कन्नै लैस करने दा कम्म हून तोड़ चढ़ने दे  
कोलकाल ऐ ते इस कम्मै गी तोड़ चाढ़ने दी जिम्मेदारी सीमा सड़क  
संगठन नै निभाई ऐ। उआं अप्रैल 2022 च प्रधानमंत्री नरेंद्र मोदी हुंदे  
आसेआ पौने 9 किलोमीटर लम्मी काजीगुंड-बनिहाल नवयुग सुरंग दे  
उद्घाटन दे बाद इस ऐतिहासिक सुरंग दा सामरिक महत्व जरूर घट्ट  
होआ ऐ कीजे एहदे इस्तेमाल हून किश खास गड्डिं दे लंग्गने लेई  
गै कीता जंदा ऐ जिनेंगी नमीं सुरंग चा लंग्गने दी खुल्ल नेई ऐ जियां  
जे तेल, पेट्रोल, डीजल दे टैंकर, एल.पी.जी गैस लैने आहले ट्रक ते होर  
दुइयें खतरनाक आइटमां लेइए जाने आहिलियां गड्डियां। 760 बाईर

रोड टास्क फोर्स दे कमांडर आमिया श्रीवास्तव होंरें दस्सेआ जे 2010 दे बाद इस ऐतिहासिक सुरंग दी मरम्मत दी लोड सेही कीती गई कीजे मतिएं थारें दा एह सुरंग चौंदी ही, एहिदएं कंधें च पानी रिसदा हा ते मती थाहें सड़क दी हालत बड़ी खराब होई गेदी ही। उनें दस्सेआ जे जुलाई 2023 च शुरू कीते गेदे इसी सोआरने दे कम्मै गी 62 करोड़ 50 लख रपे दी लागत कन्नै रिकार्ड 18 म्हीने दे अंदर मुकम्मल कीता गेआ ऐ ते तौलं गै इसी ट्रैफिक लेई खोली दिता जाग ते सतह समुंद्र कोला 2200 मीटर दी उंचाई पर वाका एह सुरंग सैलानिएं लेई बी इक आकर्षण दा केंद्र साबत होग।

<><><><><><><>

### **Mitali-Raj**

भारतीय महिला क्रिकेट टीम दी साबका कप्तान मिताली राज गी आंध्र क्रिकेट एसोसिएशन ए.सी.ए नै महिला क्रिकेट संचालन दे मेंटोर नियुक्त कीता ऐ। मिताली ते ए.सी.ए बश्कार त्रऊं बरें लेई मुहायदा होआ ऐ। ओह राज्य च नौजोआन प्रतिभाएं दा पता लाइयै महिला क्रिकेटरें दी अगली पीढ़ी गी अगड़े बदाने ते तैयार करने दा कम्म करंगन। मिताली नै 2022 च अंतरराष्ट्री क्रिकेट थमां सन्यास लेई लैता हा ते लम्में अरसे तगर ओह खेड्डें च महिलाएं दी शमूलियत दी

हिमायती रेइयां ते महिलाएं गी खेड्डें दे खेतर च बढ़ावा देने लेई उनें  
मता कम्म कीते दा ऐ।



## **Jharkhand-Campaign**

झारखंड च असेंबली चुनाएं दे दुए मरहले लेई संझा 5 बजे चुनां प्रचार  
सम्पन्न होई गेआ। इस म्हीने दी 20 तरीकै गी झारखंड दे 38एं चुनां  
हल्कें च मतदान करोआया जाग। सब्बनें सियासी पार्टिएं दे वरिश्ठ  
नेताएं ते स्टार प्रचारकें मतदाताएं गी अपनी भेठा आकर्षित करने  
दियां सब्बै कोशिशं कीतियां। उत्तर प्रदेश दे मुखमंत्री ते सीनियर  
बीजेपी लीडर योगी आदित्यनाथ हों साहिबगंज जिले दी राजमहल  
थाहरें चुनां रैली करियै मतदाताएं गी भरोसा दोआया जेकर उंदी पार्टी  
सत्ता च औंदी ऐ तां बंग्लादेशी घुसपैठिएं गी कड्डी दिता जाग। उनें  
आखेआ जे हेमंत सोरेन घुसपैठिएं दा वोटें लेई संरक्षण करा करदे न।  
उनें दोष लाया जे हेमंत सोरेन हुंदी सरकार तैहत भ्रष्टाचार ते  
बेरोजगारी बधी ऐ। तोआई इंडिया ब्लॉक नै महिलाएं लेई नकद गारंटी  
नौजोआनें गी रोजगार ते केंद्र आसेआ झारखंड कन्ने फर्कोफकी ते  
घट्टोघट्ट फंड बागुजार करने दा दोश लाया। सीनियर बीजेपी लीडर  
ते प्रधानमंत्री नरेंद्र मोदी हुंदी अगुवाई च एनडीए नै अपना चुनां प्रचार

कीता। एनडीए दे स्टार प्रचारकें च अमित शाह, योगी आदित्यनाथ, शिवराज सिंह चौहान, हिमंत बिस्वा सर्मा, चिराग पासवान ते मिथुन चक्रवर्ती शामिल हे।

<><><><><><><>

### **CEO-Jharkhand**

झारखंड दे मुख चुनां अफसर के. रवि होरें मेदवारें गी निर्देश दिते न जे ओह 20 नवंबर गी संझा 5 बजे तगर अपने अपने रिटर्निंग अधिकारिं गी वोटें दी गिनतरी करने आले एजेंटें बारै ब्यौरा हासिल करोआई देन।

<><><><><><><>

### **Maharashtra-Campaign**

महाराष्ट्र च असेंबली चुनां दे दुए मरहले गितै चुनां प्रचार अज्ज संझा खत्म होई गोआ ऐ। बक्ख-बक्ख सियासी दलें दे वरिष्ठ लीडरें ते स्टार प्रचारकें, मतदातां गी अपने आली भैठा करने च कोई कसर बाकी नेई रक्खी। भारती जनता पार्टी दे प्रमुख ते केंद्रीय मंत्री जे.पी नड्डा होरें नवी मुम्बई दे बेलापुर च इक चुनावी रैली गी संबोधित करदे कीता ते आखेआ जे महायुति करी महाराष्ट्र च खुशहाली बेहतर

प्रशासन, कल्याण ते पूरा पराता विकास होआ ऐ। उनें आखेआ जे महायुति ते एनडीए राज्य ते देसै गी विकास दी बता पर लेआ करदे न। उनें कांग्रेस ते एनसीपी दे लीडरें पर बंड पोआने आहली सियासत करने दा दोष लाया। एनसीपी नेता शरद पवार होरें पुणे ते अहिल्यानगर च अपनी पार्टी लेई चुनां प्रचार कीता। तोआई दुए पास्सै बीजेपी अध्यक्ष होरें अक्कलकोट ते कर्जत च बी चुनावी रैलिंग गी संबोधित कीता।

<><><><><><>

### **Iraq-Blast**

इराक दे सलाहुद्दीन प्रांत च होए दे बम्ब धमाके च कुर्दिस्तान क्षेत्री सरकार दे फौजी बलें दे त्रै सैनिक मारे गेन। इराक दी सेना ते पेशमर्गा बलें दी सांझी टीम दी गश्त दौरान एह धमाका होआ ऐ। इस्लामिक स्टेट आतंकी संगठन आसेआ कराए गेदे इस हमले च त्रै इराकी सैनिकें दे घायल होने दी बी खबर ऐ।

<><><><><><>

## Hideout

सुरक्षाबलें दक्खनी कश्मीर दे शोपियां जिले च जिर्मीं हेठ बनाए दे आतंकियें दे इक ठिकाने गी तबाह करी दिता ऐ। पुलस सूत्रें मूजब शोपियां पुलस, सेना ते सी.आर.पी.एफ नै इक सांझे अभियान दौरान लश्कर-ए-तैयबा लेई कम्म करा'रदे टी.आर.एफ दे इक ठिकाने गी तबाह करी दिता। तपाशी अभियान दौरान उत्थुआं हथियार, गोला-बरूद, कम्बल, खाने-पीने आहला समान, ट्रंक ते दुआ समेयान जब्त कीता ऐ। पुलस ते सुरक्षाबले खिते शां आतंकियें दा सफाया करने लेई लगातार इयें जनेह अभियानें गी अंजाम देआ'रदे न।

<><><><><><>

## Terrorist-Arrest

सुरक्षाबलें अज्ज दक्खनी कश्मीर दे त्राल इलाके च इक आतंकी गी हथियारें ते गोला-बरूद कन्नै गिरफ्तार कीता ऐ। पुलस दे इक वरिश्ठ अधिकारी नै दस्सेआ ऐ जे अवंतीपोरा पुलस, सी.आर.पी.एफ दी 180मीं बटालियन ते 42मीं राश्ट्रीय राइफल्स नै इक सांझे अभियान दौरान त्राल इलाके शां लश्कर-ए-तैयबा कन्नै जुड़े दे इक आतंकी गी गिरफ्तार करी लैता। एहदी पंछान इरशाद अहम चौपान कन्नै कीती गई ऐ। पुलस नै ओहदे कब्जे थमां इक्क पिस्तौल, दो मैबजीनां, 18

रौंदां ते होर दुआ समान जब्त कीता ऐ। अधिकारी नै दस्सेआ जे  
शुरूआती पुच्छ-गिच्छ दौरान एह पता लग्गा ऐ जे दोषी दक्खनी  
कश्मीर च होए दे केई आतंकी गतिविधियें च मुलव्वस हा।

<><><><><><>